
ԱՐԴՈՒՆ ԽԱՆԻ ԴԵՄ ԿԱԶՄԱԿԵՐՊՎԱԾ ԴԱՎԱԴՐՈՒԹՅԱՆ
ԵՎ ԴՐԱ ԳՐԱԿԱՆ ԱՐՁԱԳԱՆՔՆԵՐԻ ՄԱՍԻՆ

ՆԱԻՐԱ ԹԱՄԱՄՅԱՆ

XIII դ. կեսերին Առաջավոր Ասիայում ստեղծված մոնղոլական մեծ պետության՝ Իլխանության կամ Էլդանության կազմի մեջ էր մտնում Հայաստանը՝ ի թիվս Պարսկաստանի, Միջագետքի, Ասորիքի մի մասի, Փոքր Ասիայի արևելյան շրջանների, Վրաստանի, Աղվանքի: 1289 թ. այդ պետության ղեկավարի՝ իլխանի՝ Հուլավյան հարստության չորրորդ ներկայացուցիչ Արղուն խանի (1284–1291) դեմ գորապետ Բուղայի կազմակերպած դավադրությունը դաժանորեն ճնշվել էր Մուղանի դաշտում, որի ժամանակ զգալի տուժել էին տեղի հայ և վրացի բնակիչները:

Գերագույն իշխանությունն ձեռք բերելու նպատակ հետապնդող հերթական այս խռովությունն արձագանք է գտել հայ միջնադարյան գրականության մեջ: Ժամանակակից երկու հեղինակներ՝ Ստեփանոս Օրբելյանը և Ֆրիկը, սերունդներին բավականին մանրամասն տեղեկություններ են թողել այս իրադարձության ու նրա ունեցած ազդեցության վերաբերյալ: Ստ. Օրբելյանը մոնղոլ վերնախավի ոչ միայն արտաքին քաղաքականության, այլև ներիշխանական հարաբերությունների մասին խոսում է նախ «Ժամանակագրությունում»¹, ապա իր գլխավոր՝ «Պատմութիւն տանն Միսական»² պատմական լայն ընդգրկում ունեցող երկասիրության գլուխներքից մեկում, որը հեղինակն անվանել է «Վասն մեծի նախարարութեանն Օրբելեանց, էթէ ուստի էին և որպէս, և վասն գալոյ նոցա յաշխարհս յայս, և վասն բազում բանից և գործոց նոցա»³, ուր պատմում է իր նախնիների, նրանց կատարած գործերի մասին՝

¹ Տե՛ս Ժամանակագրութիւն Ստեփաննոսի Օրբելեանի (այսուհետև՝ Ժամանակագրություն), հրատարակության համար պատրաստեց պատմ. գիտ. թեկնածու՝ Աշ. Աբրահամյանը, Երևան, 1942:

² Տե՛ս Ստեփաննոսի Միսնեաց եպիսկոպոսի Պատմութիւն տանն Միսական, ի լոյս ընծայեաց Սկրտիչ Էմին, Մոսկվա, 1861 (այսուհետև՝ Օրբելյան, 1861), էջ 315: Այս երկը տարբեր հրատարակություններում տարբեր կերպ է անվանված՝ «Պատմութիւն նահանգին Միսական» [տե՛ս Պատմութիւն նահանգին Միսական, արարեալ Ստեփաննոսի Օրբելեան արքեպիսկոպոսի Միսնեաց, ի լոյս ընծայեաց հանդերձ ծանոթութեամբք Գարապետ Վարդապետ Շահնագարեանց՝ միաբան սրբոյ Էջմիածնի, Փարիզ, 1859 (այսուհետև՝ Օրբելյան, 1859)]: Սկրտիչ Էմինը երկու գրագիր և արդեն տպագիր օրինակների հիման վրա հրատարակել է պատմության համեմատական բնագիրը՝ նպատակահարմար համարելով վերնագրել «Պատմութիւն տանն Միսական» (տե՛ս Օրբելյան, 1861), աշխարհաբար հրատարակությունն ունի «Մյունիքի պատմություն» վերնագիրը [տե՛ս Ստեփաննոսի Օրբելյանի Մյունիքի պատմություն, թարգմ., ներած. և ծանոթ. Ա. Ա. Աբրահամյանի, Երևան, 1986 (այսուհետև՝ Օրբելյան, 1986)], իսկ հեղինակը հիշատակարանում՝ ՀԳ գլխում, իր գործը կոչում է «Յիշատակաց մատեան» [տե՛ս օրինակ՝ Մ. Մաշտոցի անվան Մատենադարանի (այսուհետև՝ ՄՄ) ձեռ. № 6271, թ. 333 ա]:

³ Պատմության այս գլուխը շատ մեծ տարածում ունի. կան ընդօրինակություններ ձեռագիր մատյաններում (տե՛ս օրինակ՝ ՄՄ, ձեռ. №№ 784, 791, 1482, 1535, 1721, 1724, 2560, 3070, 3498, 4584, 6882, 6995,

առավել ծանրանալով իր ապրած ժամանակաշրջանի վրա, երբ Հայաստանը մոնղոլական լծի տակ էր:

Ֆրիկն այս իրադարձության թարմ տպավորությունների ներքո գրել է «Վասն Արդուն դանին և Բուղային»⁴ չափածո ստեղծագործությունը, ուր պատմական փաստերի հետ մեկտեղ հաղորդում է ինքնակենսագրական որոշ տեղեկություններ:

Վերոհիշյալ գործերն ունեն սկզբնաղբյուրի արժեք, քանի որ նկարագրված դեպքերը ժամանակակիցների վկայություններ են: Հետագայի այլ հեղինակներ ևս խոսել են այս մասին, սակայն կա՛մ շատ համառոտ, կա՛մ օգտվել են նախորդներից. «Ի թվին ՉԼԷ⁵ սպանին զՉինքսանպուղայն, զՉողկապն և զԹաղա Տամարն»⁶, «Կոտորեաց Արդունն զՋալալտայքն և այլ բազում նուինայս յաղագս ապստամբութեան, ընդ որս և զանմեղ թագաւորն Վրաց զԴեմետրէ սպանին»⁷:

Պատմական այս դիպվածին գրականագիտական տեսանկյունից անդրադարձել են Մ. Արեղյանը⁸, Տ. Մուշկամբարյանը⁹, երբ խոսել են Ֆրիկի հիշյալ քերթվածի մասին, իսկ Ա. Հովհաննիսյանը պատմաքննական լույսի ներքո է լուսաբանել այն¹⁰՝ կրկին Ֆրիկի առիթով:

Ստ. Օրբելյանը վկայում է. «Ի թագաւորելն Արդունին և ի տիրելն ի վերայ ամենայն աշխարհաց և ի սատակելն զթշնամիսն՝ էր բուն պատճառն և զաւրաւիզն Բուղայն կոչեցեալ, որ յետոյ Չինքսան անւանեցին»¹¹: Այս Բուղան գործողությունների կենտրոնական դեմքն է, որի նկատմամբ իլյսանական բարեհաճությունը սկիզբ էր առել դեռևս Աբաղա խանից: Ռաշիդ ադ դինը՝ Ղազան խանի (1295–1304) վեզիրը, Հուլավյանների պալատական ժամանակագիրը, գրում է, որ Ջալաիր ցեղից սերող Էմիր Բուղան դեռ երեխա ժամանակ զրկվել էր հորից, և Աբաղա խանը հովանավորել

7084, 8384, Նոր Ջուղայի Ամենափրկիչ վանքի ձեռ. № 427, 562, Բրիտանական թանգարանի ձեռ. № 118, Բողղեյան գրադարանի ձեռ. № 95 և այլն), թարգմանվել է լատիներեն, ֆրանսերեն, ռուսերեն (История князей Орбелянь, извлечение из сочинений Стефана Сюнийскаго, армянскаго писателя XIII века, перевелъ съ армянскаго Х. Иоаннесовъ, М., 1881):

⁴ Ֆրիկ. Տաղեր, առաջաբանը, բնագրի պատրաստումը, հավելվածը Ա. Ղանալյանյանի (այսուհետև՝ Ֆրիկ), Երևան, 1982, էջ 72:

⁵ Այստեղ թվական տվյալի անստուգություն կա. դեպքը կատարվել է հայոց ՉԼԸ (738)՝ ընդհանուր 1289 թվին [տե՛ս Օրբելյան, 1861, էջ 315, նաև Р а ш и д - а д - д и н. Сборник летописей (այսուհետև՝ Р а ш и д - а д - д и н), т. III, М.-Л., 1947, с. 121]:

⁶ Անանուն ժամանակագրություն, կազմեցին Հովհ. Մանվելյան, Հար. Արրահամյան, Երևան, 1940, էջ 26:

⁷ Մխիթար Այրիվանեցու պատմութիւն հայոց, ի լոյս ընծայեաց Մկրտիչ Էմին, Մոսկվա, 1860, էջ 68-69:

⁸ Տե՛ս Մ. Արեղյան. Հայոց հին գրականության պատմություն, հ. II, Երևան, 1946, էջ 260, 543-546:

⁹ Տե՛ս Տիրայր Եպո. Մոռացված մի հայ երգիչ. «Արարատ», 1918, № № Ա-Գ, Դ-ԺԲ, նաև Ֆրիկ. Դիվան, լույս ընծայեց առաջին անգամ ամբողջական բնագրով, ուսումնասիրություններով, հավելվածներով և բառարանով Տիրայր արքեպիսկոպոս, Նյու Յորք, 1952, էջ 44-74:

¹⁰ Տե՛ս Ա. Հովհաննիսյան. Ֆրիկը պատմաքննական լույսի տակ, Երևան, 1955: Այս իրադարձության անդրադարձել, Օրբելյանի ու Ֆրիկի երկերը՝ որպես սկզբնաղբյուր, օգտագործել են Մ. Չանյանը (Հայոց պատմություն, հ. Գ, Երևան, 1984 էջ 282), Հ. Մանանդյանը (Երկեր, հ. Գ, Երևան, 1977, էջ 315) և ուրիշներ:

¹¹ ՄՄ, ձեռ. № 8481, թ. 212 ա, նաև Ժամանակագրություն, էջ 30:

էր, դարձրել մեծատուն, ապա նրան էր վստահվել նարին գանձարանը¹², շնորհվել ալ-թամգա: Ստ. Օրբելյանը Բուղայի ցեղի մասին ասում է. «...և այն ազգ յոլով էր քան զամենայն ազգս և յաղթող», թեպետ անվանում է Ջալակիր, ոչ թե Ջալաիր. «Եւ էր այրն այն ազամբ Ջալակիր կոչեցեալ»¹³: Արդուն խանի օրոք Բուղան ավագ էմիրներից մեկն էր¹⁴, շատ մեծ լիազորությունների տեր, տիրապետում էր իշխանական այնպիսի հզոր լծակների, որ իր ձեռքում էր կենտրոնացրել պետության ֆինանսական ողջ հոսքերը, ուժային կառույցները: Հավանաբար, այս անսահման իշխանության, ապա նաև կազմակերպած դավադրության մասին տարածված լուրերն են հետզհետե ուռճացել այն աստիճան, որ նրան համարել են Արդունից հետո գահին տիրած խան: Նման տեղեկության հանդիպում ենք մի մանր ժամանակագրության մեջ, որը հեղինակել է Կիլիկիայի Հեթում II թագավորը¹⁵. «Արդունն յետ Թուլար Բուղան նստաւ: Յետ Թուլար Բուղային Թողթան նստո...»¹⁶:

Բուղայի հանդուգն վարքագիծն ուներ իր պատճառները. Արդուն խանը Բուղայի անմիջական աջակցությամբ էր բանտից ազատվել ու գահ բարձրացել՝ հաղթելով հորեղբորը՝ Թագուդար-Ահմեդ խանին (1282–1284) և նրա կողմնակիցներին: Հետագայում գահակալը վարձահատույց էր եղել՝ տալով նրան կոչումներ և իշխանություն. «Սա (Բուղան – Ն. Թ.) ի մահու և ի կապանաց հանեալ զնա (Արդունին – Ն. Թ.), թագաւորեցոյց ի վերայ ամենայնի: Եւ սակս այն մեծի երախտեացն պատուեցաւ և փառաւորեցաւ ի նմանէ և եդաւ ի վերայ ամենայն գործոյ և տանն արքունի և զաւրաց և աշխարհաց իւրոց, այնքան, զի միայն յանուանէն ինքն ուներ գտերութիւն և Արդունն բացի զբաւսնելոյն ի խաղս և ի թատերս և յորսս, որպէս արէնն է հեթանոսաց, այլ ինչ ոչ հոգայր և ցնորէր, այլ ամենայն նմա ապաստան լինէր»¹⁷: Բուղան առավել հաջողությունների հասավ Սահիպ Դիվանի՝ Մուհամմեդ Շամս ադ դին Ջուվեյնու մահից հետո¹⁸, քանի որ վերջինս շատ մեծ դեր ուներ պետության մեջ: Անցյալում կատարած խիզախ արարքները այժմ առիթ էին տալիս Բուղային տեր զգալու. ամեն ինչ պետք է կատարվեր նրա գիտությամբ. անգամ իլիսանական հրամաններն ու

¹² Արքունական գանձարանը այդ ժամանակ առանձին մասերից էր բաղկացած, և այն մասը, ուր պահվում էին առավել թանկարժեք գանձերը, նարինն էր (տե՛ս Պ ա թ ա թ ի ճ - ա ճ - ճ ի ճ, ս. 299):

¹³ Ժամանակագրություն, էջ 30:

¹⁴ Պ ա թ ի ճ - ա ճ - ճ ի ճ, ս. 92.

¹⁵ Հեղինակային պատկանելությունն ակնհայտ է դառնում երկի առաջին իսկ նախադասություններից. «Ի թվին Հայոց ՋՃՂԹ (1250) ի յունիս ԻԹ (29) սպանին զպարոն Հեթումն, տեր Լամբրունին, պապն իմ» (Մանր ժամանակագրություններ (XIII-XVIII դդ.), հ. II, կազմեց Վ. Հակոբյան, Երևան, 1956, էջ 511): Հեթում պատմիչի և Հեթում թագավորի մասին տե՛ս Մանր ժամանակագրություններ (XIII-XVIII դդ.), հ. I, կազմեց Վ. Հակոբյան, Երևան, 1951, էջ 65-73:

¹⁶ Մանր ժամանակագրություններ (XIII-XVIII դդ.), հ. II, էջ 512: Վ. Հակոբյանը այս առիթով 533-րդ էջում տալիս է հետևյալ ծանոթագրությունը. «Այստեղ ակնարկվում է Բուղայի դավադրությունը, բայց սա Արդունից հետո չի իշխել (մանրամասն տե՛ս ՄՄ, 1, էջ 48-49)»: Հղված են ոմն Ստեփանոս եպիսկոպոսի «Ժամանակագրության» վերջին էջերը: Երականում այս երկի հեղինակային պատկանելության հարցը, հոգուտ Ստեփանոս Օրբելյանի, այժմ արդեն լուծված է (տե՛ս Է. Բ ա դ դ ա - ս թ յ ա ն . XIII դարի մի ժամանակագրության հեղինակի մասին. – ՊԲՀ, 1971, № 2, էջ 210):

¹⁷ Ժամանակագրություն, էջ 30:

¹⁸ Տե՛ս Պ ա թ ի ճ - ա ճ - ճ ի ճ, ս. 119.

կարգադրությունները չէին կատարվում առանց էմիրների էմիր կամ բեկլար-բեկի՝ չինքսան¹⁹ Բուղայի իմացության: Ստ. Օրբեյանն իր Պատմության մեջ նրան անվանում է մեծ գորապետ և «Չինքսանն, որ կոչի աւագաց աւագ կամ տերանց տէր»²⁰, իսկ «Մամանակագրության» մեջ գրում է. «Այա ժողովեալ յինքն՝ զաւրացաւ, բարձրացաւ, գոռոզացաւ, հպարտացաւ այրն այն. և ոչ կարաց հանդուրժել իրացն, այլ կամեցաւ անձամբ հափշտակել յինքն և զայրոռ թագաւորութեան և զբնիկ այրսն արմատաքի ջնջել»²¹: Նույնիսկ այն աստիճան էր մեծամտացել, որ արհամարհանքով էր վերաբերվում Արդունի անձնական էմիրներին: Սրանք էլ իրենց հերթին հետևում էին Բուղային ու նրա եղբորը՝ Արուխին (որը միաժամանակ եղբոր գլխավոր դաշնակիցն էր), բոլոր կասկածելի քայլերի մասին տեղեկացնում էր իլխան Արդունին և Բուղայից վրեժխնդիր լինելու հարմար պահի էին սպասում. Բուղան ժամանակին վիրավորել էր նրանց, պատժել՝ իր ունեցած գրեթե անսահմանափակ իշխանությունը գործի դնելով: Իսկ այժմ Բուղան հստակ ծրագիր ուներ. չէր բավարարվում երկրում ունեցած իր առաջավոր դիրքով և ուզում էր միանձնյա իշխել բոլորի վրա: Ռաշիդ ադ դինը, ցույց տալու համար Բուղայի գործությունը, վերապատմում է երկու էմիրների՝ Մադր ադ դինի և Թոգաչարի գրույցը, ուր արտահայտվում է նույն միտքը, ինչ որ կար Ստ. Օրբեյանի «Մամանակագրությունից» վերևում մեջբերված հատվածում. «Բուղան իր համար թագավորություն է նախապատրաստել, քանզի անում է այն, ինչ ուզում է՝ առանց թագավորի ու էմիրների խորհրդի հրահանգների և իր կամքով ծախսում է փողերը: Ոչ ոք Արդուն խանին որպես թագավոր չի մեծարում, այլ միայն Բուղային: Նույնիսկ Թավրիզի վալին՝ էմիր Ալին, ոչ մի ուշադրություն չի դարձնում սուրհանդակների վրա, որոնք Թավրիզ են գալիս յառլիկով ու փայլզայով. էթե չունեն Բուղայի ալ-թամգան, անօգուտ վերադառնում են»²²: Իր նպատակին հասնելու համար գորապետը դիմում է գործնական քայլերի. «Ահա այսպես խորհուրդ ի մեջ առեալ, յինքն գրաւէ զսիրտս ամենայն մեծամեծացն ի ծածուկ»²³: Ռաշիդ ադ ադինը վկայում է, թե Բուղան լավ էր հասկանում, որ առանց որևէ արքայազնի օժանդակության Արդուն խանի դեմ ելնել չի կարող, ուստի սուրհանդակ է ուղարկում Ջուշկաբի²⁴ մոտ և առաջարկում է իր օժանդակությունը իլխանական գահը տիրելու գործում: Պետական իշխանությունը, ինչպես փորձում էր համոզել Բուղան, բոլոր գրված ու չգրված օրենքներով վերապահված էր հենց Ջուշկաբին, սակայն դեպքերի բերումով այժմ Արդունին է²⁵: Բուղան նման քայլի՝ գահը «օրինական» տիրոջը վերադարձնելու փորձ արդեն ուներ: Ջուշկաբը, որը նույնպես խորամանկ մեկն էր, իսկույն կռահում է Բուղայի մտադրությունը, հիշում է Թագուդար-Ահմեդ խանի տխուր

¹⁹ Ֆրիկ, էջ 73:

²⁰ Օրբեյան, 1861, էջ 315:

²¹ Մամանակագրություն, էջ 30:

²² Р а ш и д - а д - д и н, с. 119.

²³ Մամանակագրություն, էջ 30:

²⁴ Ջուշկաբը Արդունի հորեղբոր որդին է, Հուլավու խանի երկրորդ որդու՝ Ջումուկուրի անդրանիկ որդին:

²⁵ Ст'у Р а ш и д - а д - д и н, с. 120.

վախճանը, որը նույնպես նրա գոհն էր, ինչպես համոզված էր Ջուզկաբբը: Իր անձի հետագա ապահովության և իլխանի առջև դավադրությանն անմասն երևալու համար դիմում է շատ զգուշավոր քայլի. Բուղայի սուրհանդակի միջոցով բարևներ ուղարկելուց զատ, նա պահանջում է բոլոր համախոհների գրավոր համաձայնությունն ու անունները²⁶: Ինչը և կատարվում է. Բուղան ու իր դավադրակիցները ուղարկում են պարտավորագիր՝ իրենց անուններով ստորագրված:

Արքայազնը չի մերժում Բուղային, որի համար արդեն խնդիրը գրեթե լուծված էր թվում, վստահեցնում է իր համակամ լինելու մեջ, և կողմերը պայմանավորվում են իրենց զորքերով հանդիպել Մուղանի դաշտում: Ե՛վ Բուղան, և՛ Ջուզկաբբը, բնականաբար, անկեղծ չէին միմյանց հետ. նրանք երկուսն էլ ունեին իրենց նպատակները. առաջինի համար արքայազնը լուր միջոց էր մոտենալու, ապա տիրելու նվիրական գահին, իսկ Ջուզկաբբն առերես համաձայնության միջոցով բթացնում էր Բուղայի զգոնությունը և դավադրության մասին հայտնում թագավորին՝ Արդունին: Վերջինս էլ երկար սպասել չի տալիս: Պատկերավոր է ներկայացնում Օրբեյյանը. «Իսկ կամքն վերին, որ յայնպիսի մահուանէն յափշտակեաց զնա և թագաւորեցոյց, նոյն և աստ տնարիներեաց, զի զծածուկ խորհուրդ սրտի նորա ծանոյց ազդմամբ Արդունին. և յաւուր պայմանին, յորում կամէր խորհրդակցաւքն կոխել զագատն արքունի Բուղայն, ինքն իսկ Արդունն, վառեալ սուսերաւք և գրահիւք ԴՌ այր յաւուր տարէմտին իւրեանց և խաղա[յ] յանկարծ առաւաւտուն ի վերայ բանակին և տանն Բուղային, զոր գիտացեալ փախստեայ անկանի ի շամբ մի մեծ և երթա[յ] ի տուն Աւջլա խաթունին, և անկանի յոտս նորուն՝ զի զերծուցէ զարիւն նորայ. ընդ որում երազ ժամանակաւ ըմբռնէին և հանեալ անտի չարամահ սատակէին՝ ընդ նմին և զամենայն ազգատոհմն և զարու զաւակ նորին ջնջէին. և զամենայն խորհրդակիցսն ի մեծամեծաց սատակեցին՝ զԱրուխն եղբայր նորին ի Բաղդատա[յ], զՈւճանն, հազարապետ զՄաժունն, հազարապետ զԽարաւունաս թուխլուխն, հազարապետ զԱշակ թուխլուխն, հազարապետ զՂազանն ի Շարուր չորս հազարապետ զՋալալադին սահիպն, զՇիմոն քահանայն ասորի և բժշկապետ և այլս բազումս ի մեծաց և ի փոքունց: Եւ եղև այս ի մեծ դաշտին Մուղանայ. յեզր Կուրա[յ], որ էր անհուն գետոց ասպնջական»²⁷:

Ռաշիդ ադ դինը չի վկայում այն մասին, թե հետապնդվող Բուղան գնում է Օլջեյ (Օրբեյյանի «Ժամանակագրությունում»՝ Աւջլա) խաթունի մոտ՝ օգնության խնդրանքով: Նա խոսում է Արդուն խանի զարմանախառն զայրույթի մասին, երբ Մուղանի դաշտում ինքն է բազմաթիվ զորքով դիմավորել Բուղային, խոսում է վերջինիս մեղայականի մասին, երբ բռնվելիս ասում է, թե թագավորի դեմ ոչինչ չունի, այլ դավադրությունը կազմակերպել է, որպեսզի հաշվեհարդար տեսնի իր թշնամիների հետ²⁸: Սակայն Ջուզկաբբը առաջ է բերում այն գրավոր փաստաթուղթը, որ դավադիրներն ուղարկել էին իրեն, և ամեն ինչ պարզ է դառնում Արդուն խանի համար: Բուղայի զրուխը սրի մեկ հարվածով հենց Ջուզկաբբն է կտրում: Սակայն մինչև գլխա-

²⁶ Նույն տեղում:

²⁷ ՄՄ, ձեռ. № 8481, թ. 212ա–212բ, Ժամանակագրություն, էջ 30–31:

²⁸ *Տէ՛ւ Բ ա շ ւ ի ը - ա ը - ը ի ն*, с. 121.

տելը կառավարանում էմիրներից մեկը ոտքով հարվածում է նրա կրծքին՝ ասելով. «Դու թագավորությանն ու գահին էիր ծարավի, ահա քեզ հատուցում դրա համար»²⁹: Դաժան հաշվեհարդարից չեն խուսափում բոլոր նրանք, ում Արդունը կասկածում էր դավաճանության մեջ: Բուդայի հետ գործակցելու համար մեղադրվում և սպանվում է վրաց Դեմետրե թագավորը, ավելի ուշ՝ նաև նույն Ջուշկաբը, որի ջանքերով բացահայտվել էր դավադրությունը: Ե՛վ Ստ. Օրբեյանը, և՛ Ֆրիկը իրենց երկերում հիշատակում են դավադիրների անունները. առաջինը, բնականաբար, ասվում են Բուդայի և Արուխի անունները, հետո արդեն մնացածներինը:

Մոնղոլական տիրապետության ժամանակ Հայաստանում աստիճանաբար գերիշխող դիրք էր գրավում Սյունյաց նախարարական տունը: Մակայն ստույգ հայտնի չէ, թե այս դավադրության ժամանակ նա ինչ դիրք է գրավել: Հավանական է, որ այս դեպքում դիվանագիտական չեզոքություն էր պահպանվում Սյունիքի տիրոջ՝ Տարսայի՝ Օրբեյանի կողմից, որը միաժամանակ վրաց թագավորի կողմից նշանակված աթաբեկ էր³⁰: Մակայն նա միաժամանակ նաև շատ ջերմ հարաբերությունների մեջ էր մոնղոլական վերնախավի հետ, ինչի սկիզբը դրվել էր դեռևս ավագ եղբոր՝ Սյունյաց մեծ իշխան Մմբատի կողմից և շարունակվելու էր որդիների միջոցով: Ստ. Օրբեյանը՝ Տարսայի՝ իշխանի որդին, նույնպես այցելել է մոնղոլ խաներին: Երկու կողմի հետ բարեկամական հարաբերություններ պահպանելու միտումը ենթադրում էր, որ Օրբեյանները պետք է ստանձնեին զուտ դիտորդի կարգավիճակ: Ստեփանոս մետրոպոլիտի խոսքերից դա հստակ երևում է. նա անթաքույց համակրանքով է խոսում Արդուն խանի մասին, անվերապահորեն մեղադրում Բուդային ու նրա դավադրակիցներին և միաժամանակ ավստոսանք արտահայտում վրաց թագավորի մահվան կապակցությամբ, որն անմեղ էր, և որի մահը «մեծ և անհնարին» սուգ բերեց ողջ քրիստոնյա աշխարհին, քանզի «... զրպարտեալ թագաւորն Վրաց Դեմետրե՝ բաղբաղելով եղին ի վերայ բարուրս մահու և տարեալ սպանին տարապարտ ի մեծ դաշտին Մովկանայ յեզր գետոյն Կուրայ ի թուին 738»³¹: Խաչատուր Կեչառեցին, որը նույնպես ժամանակակից է եղել այս իրադարձությանը, «Ողբ վասն աւերման տանս արեւելեան» քերթվածում ներկայացնում է այն բոլոր անհատներին, որոնք իրենց գործունեությամբ ազդեցություն են թողել ոչ միայն Հայաստանի, այլև հարևան՝ «արեւելեան» երկրների վրա և որոնք արդեն ողջ չեն: Նա ցավ է ապրում վրաց թագավորի եղերական մահվան համար.

*Ջարքայն չիշխեմ յիշել զվրացի՝
Ջատլասերեսն ըզԴեմետրեի,
Որ դեռ քրրտունքն ի վայր կու հոսի
Միրտրն քաշած ու դեռ կենդանի»³²:*

²⁹ Նույն տեղում:

³⁰ Օրբեյան, 1859, էջ 173:

³¹ Օրբեյան, 1861, էջ 315:

³² Խաչատուր Կեչառեցի. Տաղեր, աշխատասիրությամբ Ա. Դոլուխանյանի, Երևան, 1988, էջ 19: Կեչառեցին այս տաղը գրել է 1289-ից որոշ ժամանակ հետո, քանի որ այստեղ հիշում է նաև

Ստ. Օրբեյանն այս թագավորի նկատմամբ ջերմ, նույնիսկ հարազատական վերաբերմունք ունի, քանի որ վերջինս մեծացել ու դաստիարակվել էր իր հոր՝ Տարսայիճ Օրբեյանի տանը և նրա հովանու ներքո, ապա նույն Տարսայիճը «բազում ջանքի և օժանդակությամբ նստուցանել յաթոռ հոր իւրոյ թագաւոր Վրաց յ721 թուականին»³³: Ստ. Օրբեյանը համոզված է, որ թագավորին դավադրության մեջ կասկածելու միակ պատճառը Բուղայի հետ ունեցած խնամխական կապերն էին. «... զի զթագաւորն Վրաց Դեմետրէ, վասն խնամութեան նորին, որ տուեալ գղուստրն իւր ի հարսնութիւն Բուղային, կալան և եղին ի բանդի, որպէս թէ համախոհ էր նորին. և յետ բազում հարցուփորձութեանց և ամենևինք անպարտ լինելոյն, սպանանեն զնա ի նոյն դաշտի և ջնջեն իսպառ զթագաւորութիւն»³⁴:

Բուղայի արարքը, բնականաբար, չէր կարող արդարացվել հայ հեղինակների կողմից, որոնք Արդուն խանին համարում էին աստվածադիր թագավոր, և անիծված էր այն մարդը, ով կհանդգներ նրան ընդդիմանալ: Տարբեր ձեռագրերի հիշատակարաններում և վիմագիր արձանագրություններում³⁵ Արդունը հիմնականում ներկայանում է որպես քրիստոնյաներին սիրող տիրակալ. դրանով էր պայմանավորված նրա նկատմամբ հայերի համակրայից վերաբերմունքը.

«Եւ յաշխարհա[կա]լութիւն Արդուն խանին [որ է ա]յգգէն Նետողաց, որ տիրէր սեռ ազգայնոց և ազանաց ամենայն Ահարկու ի վերա անաւրէն և ապստամբ ազգացն մահ[մ]ետականաց, և յոյժ գտած և խնամած բարեպաշտ աղագաց քրիստոնէից ընտրեալ ի բանէն Աստուծոյ և աւժեալ շնորհաւք նորին և գաւազան բազկան ամենագաւր ըմբռնեալ խորտակել և մանրել զխստացեալ պարանոց անհնազանդից արիւնաց իւրոց»³⁶:

«Ի ժամանակ Արդուն դանի
Քրիստոնէից հոյժ սիրելի»³⁷,

«Իսկ որ ուներ զաշխարհն հայրենի,
Արդուն դան և մեզ բարի,
Քրիստոնէիցս սիրելի,
Եւ զաշխարհս արար զահիւ ի լի»³⁸ և այլն:

«խաչի ծաղիկ», «հայոց ազգի լուսաւորիչ» Ստ. Օրբեյանին, որը 1303-ին էր մահացել (տե՛ս նույն տեղում, էջ 20):

³³ Օրբեյան, 1861, էջ 311:

³⁴ ՄՄ, ձեռ. № 8481, թ. 212 բ, Ժամանակագրություն, էջ 31: Հ. Մանանդյանը կարծում է, որ Դեմետրե թագավորը Բուղայի աներն էր (տե՛ս Հ. Մանանդյան, Երկեր, հ. 9, էջ 315), սակայն, ըստ Օրբեյանի, նրանք խնամիներ էին. վրաց արքայադուստրը, թերևս, Բուղայի որդու կինն էր և ոչ թե Բուղայի:

³⁵ Տե՛ս օրինակ՝ Դիվան հայ վիմագրության, պրակ III, կազմեց Ս. Բարխուդարյանը, Երևան, 1967, արձ. № 219, էջ 78, պրակ IV, կազմեց Ս. Բարխուդարյանը, Երևան, 1973, արձ. № 821, էջ 198, պրակ V, կազմեց Ս. Բարխուդարյանը, Երևան, 1982, արձ. № 316, էջ 100, պրակ VI, կազմեցին Ս. Ավագյանը, Հռ. Ջանիփոլադյանը, Երևան, 1977, արձ. № 140 ա, էջ 71 և այլն:

³⁶ Հայերեն ձեռագրերի հիշատակարաններ, ԺԳ դար, կազմեց Ա. Մաթևոսյանը, Երևան, 1984, էջ 557:

³⁷ Նույն տեղում, էջ 600:

³⁸ Նույն տեղում, էջ 601:

Այս վաչկատունների նվաճողական արշավանքը Սյունիքի հոգևոր առաջնորդ Տեր Ստեփանոսն անվերապահորեն համարում է Աստծո կողմից հայերին ուղարկված հերթական մի փորձություն և պատիժ՝ գործած սխալների համար, երբ մի ազգ՝ տվյալ դեպքում նոր կազմավորված, դեռևս լիովին չձևավորված ցեղային խմբավորումները, ընդամենը որպես պատժելու միջոց է հանդես գալիս մեկ այլ ազգի համար: Դեռևս Մեթոդիոս եպիսկոպոսի տեսիլում³⁹, որը թարգմանել է Ստեփանոս Սյունեցի եպիսկոպոսը VIII դ., արտահայտվում է հետևյալ միտքը. «Ասաց Մովսէս ցորդիսն Իսրայելի՛ ոչ զի սիրէ զձեզ Տէր Աստուած տանել յերկիրն աւետեաց ժառանգել զնա, այլ վասն անօրէնութեան բնակչաց նորա:

Այսպէս և ցորդիսն Իսմայելի ոչ զի սիրէ զնոսա Տէր Աստուած, տայ զօրութիւն աւերել զերկիր քրիստոնէից. այլ վասն անօրէնութեանն որ լինի. վտանգ այսպիսի ոչ եղև նոցա և ոչ այլ լինիցի երբէք»⁴⁰: Մի ավետարանի հիշատակարանում կարդում ենք. «[Գրեցաւ... ի հայրա]պետութիւն տեառն[՝] Յակոբա, ի թա[գաւոր]ութիւն Լևոնի, յաշխարհակալութիւն և [յա]ղթութիւն Արդու խանին, յայս նեղ և ի դառն ժամանակիս, որ հասել եկն ի վերայ մե[ր] վասն մեղաց մերոց, որ նախանձ կալեալ յաղագս քրիստոնէից և ըստ նախանձոյ նոցա եկան ազգն Նետողաց և գերեաց զաշ[խ]արհս ամենայն»⁴¹: Հայերն ունեին իրենց ազատագրական լեզունը, ըստ որի՝ օտարի լծից իրենց պետք է ազատագրեր քրիստոնյա մի թագավոր կամ քրիստոնյաներին սիրող մի թագավոր. լեզունը կարող էր ժամանակ առ ժամանակ շրջանառվող տեսիլների միջոցով ներկայանալ և ենթարկվել որոշ ձևափոխությունների՝ ըստ պահի նպատակահարմարությամբ⁴²: Այս դեպքում Ֆրիկը ևս «...տարվել էր այն պատրանքով, թե թաթարների բերած աղետներին ու պատահարներին վերջ պիտի դնի էլխան Արդունը, որին նա համարել էր «աստուածադիր թագավոր»: Այդ պատրանքի մեջ դժվար չէ նշմարել Արդունի հետ կապված տարածուն ակնկալությունների արձագանքներից մեկը: ... Արդունը... հատուկ յառլիկներով կոչ էր անում վերացնել «ամեն բռնություն» և «վիրավորանք», հոգ տանել հպատակների վստահությունը նվաճելու մասին»⁴³: Համաձայն Ստ. Օրբելյանի՝ քրիստոնյաների աստվածն իր հովանու տակ է վերցրել Արդունին. «Իսկ Աստուածն քրիստոնէից յայնմ գիշերի դարձոյց զսիրտ մեծամեծացն առ Արդունն, զոր հանեալ ի բանտէ կապանացն՝ թագաւորեցուցին»⁴⁴: Այս նույն վերին կամքն է հետագայում նրան ուղղորդում ճնշելու Բուդայի դավադրութե-

³⁹ Պատարի եպիսկոպոս Մեթոդիոսի այս տեսիլը բավականին լայն տարածում է ունեցել միջնադարյան Հայաստանում: Այդ է վկայում այն հանգամանքը, որ այն մեզ է հասել ոչ միայն Ստ. Օրբելյանի Պատմության մեջ մի առանձին գլխով, այլև առանձին ընդօրինակություններով (տե՛ս օրինակ՝ ՄՄ, ձեռ. № 2644): Այս տեսիլի մասին տե՛ս Ն. Թ ա մ ա մ յ ա ն. Ս. Մեթոդիոսի երազը Ստեփանոս Օրբելյանի «Սյունիքի պատմությունը» երկում. – «Հայագիտական հանդես», 2006, № 1, էջ 67:

⁴⁰ Օրբելյան, 1861, էջ 105-106:

⁴¹ Հայերեն ձեռագրերի հիշատակարաններ, ԺԳ դար, էջ 598:

⁴² Այս մասին տե՛ս Ն. Թ ա մ ա մ յ ա ն. Տեսիլը որպես գրական-գեղարվեստական մտածողության դրսևորում. – «Էջմիածին», 2005, № Ժ-ԺԱ, էջ 95:

⁴³ Ա. Հ ո վ հ ա ն և ի ս յ ա ն. Դրվագներ հայ ազատագրական մտքի պատմությունից, գիրք առաջին, Երևան, 1957, էջ 251:

⁴⁴ Օրբելյան, 1861, էջ 312:

յունը: Այս պատճառով է, որ ոչ ոք չպետք է հանդգներ դուրս գալ թագավորի դեմ, սակայն Բուղան դա արել է: Ֆրիկն իր վերոհիշյալ քերթվածում ունի Բուղային ուղղված այսպիսի տողեր.

*Բուղա՛, դու ո՞նց կամիր նենգել,
Աստուածադիր թագաւորին,
Ձոր քրիստոնեայքն ամէն հաւսար,
Ի յայստուծոյ կու խնդրէին⁴⁵:*

Բանաստեղծը, որն ունի մարդկային բարձր հատկանիշներ, զարմանում է և անկեղծորեն չի կարողանում պատկերացնել, թե այդ ինչպես է հնարավոր, որ Բուղան կամ ընդհանրապես մարդը մոռանա մեկ ուրիշ մարդու երախտիքը, եթե նույնիսկ մի պահ անտեսենք հպատակության հանգամանքը.

*Բուղա էիր՝ չինքսան եղար,
Բեկլար-բեկի՝ իր հեծելին,
Չգիտեմ թե՛ զի՞նչ կամիր լիներ,
Դու չիր որդին Չանկըզ դանին⁴⁶:*

Ֆրիկի համար պարզ է, որ գորապետը չէր վերլուծել իր հնարավորությունները, հստակ չէր պատկերացրել իր անելիքը, այլապես նա չէր դիմի այդ քայլին. ինչի՞ վրա էր դրել Բուղան իր հույսը, չէ՞ որ Չինգիզ խանի սերնդից չէր, իսկ իլխանության թագը կարող էին կրել միայն խանի ժառանգները, քանի որ այն տրվում է ի վերուստ: Ֆրիկը քաջատեղյակ էր մոնղոլական պայատակական անցողարձին, շատ լավ ճանաչում էր գլխավոր գործող անձանց, գիտեր նույնիսկ բոլորի տոհմաբանությունը: Այս իրադարձության թողած տպավորությունները գեղեցիկ առիթ են հանդիսացել, որպեսզի բանաստեղծն ընթերցողին հայտնի իր խոհերը՝ կապված դավաճանության, երախտամոռության, գայթակղության, տիրադավության, իշխանատենչության ու նման արատավոր այլ երևույթների հետ: Եվ դա անում է բազմաթիվ իմաստուն աֆորիզմների միջոցով: Իհարկե, դեպքերի ժամանակակից հեղինակը չի կարող լռել. նա պետք է բարձրաձայնի, որ Բուղան գրեթե հավասար էր Արդունին, սակայն գայթակղությունը կործանեց նրան, և որքան շատ է բարձրանում մարդը, այնքան ընկնելն ավելի ցավոտ է լինում: Բանաստեղծը համոզված է, որ աստված արդար դատավոր է, քանի որ չարն ստացել էր իր արժանին. Տերը «գետին է զարկել» դավադրության պարագլուխներին՝ Բուղա և Արունի եղբայրներին:

Միջնադարյան գրականությունն ուսումնասիրող հեղինակները, բնականաբար, չէին կարող չանդրադառնալ այդ ժամանակաշրջանի կարևոր իրադարձություններին ու անձանց, որոնք գրական ստեղծագործությունների համար նախատիպ, հիմք,

⁴⁵ Ֆրիկ, էջ 73:

⁴⁶ Նույն տեղում:

справедливой. Вместе с изложением событий, они выражают свои суждения по поводу предательства, неблагодарности, искушения, властолюбия и т. д.

TO THE PLOT AGAINST KHAN ARGHOUN AND ITS LITERARY RESPONSES

NAIRA TAMAMYAN

S u m m a r y

In the middle of the 13th century the Mongol dominion was firmly established in the countries of the Front Asia. Armenia was among them. The ruler of the Mongols of that period was Khan Arghoun, who had been released in his time by Bougha - the military leader of the Mongols. The fact caused Bougha to be given great authorities. In spite of it in 1289 he hatched a plot against his king. The plot was discovered and the organizers were cruelly punished. These events reflected on the works of the contemporaries. Exactly in "The History of Syunik", "The Annals" by Stepanos Orbelyan and "About Khan Arghoun and Bougha" by poet Frik. In connection with the fact that Khan Arghoun regarded the Christians with favour, and Armenians looked forward to their saving, in the works of the Armenian authors he is presented a deserving ruler, while Bougha is denounced, and his death is considered to be just. With the account of the events they express their judgements about treachery, ingratitude, temptation, love of power, etc.